

四庫全書

集部

欽定四庫全書

集部

宋元詩會卷二十六

詳校官中書_臣陸 湘

主事銜_臣徐以坤覆勘

總校官知縣_臣繆 琪

校對官中書_臣牛稔文

謄錄監生_臣范廷驊

欽定四庫全書

宋元詩會卷二十六

兵部主事陳焯編

孫覺

字莘老高郵人甫冠從胡瑗受學為同學所推登進士調合肥主簿試館職預首選為校勘神宗初以昌王記室擢右正言生希旨舉劾大僚落職通判越州徙通州以知諫院召嘗入對神宗言呂惠卿為利之故屈身王安石其交必解後果交惡復奏青苗民所不願出知廣德軍徙湖州廬州丁祖母憂去服除知蘇州福州入為祕書少監哲宗立遷右諫議大夫進吏侍擢御史中丞移疾提舉舒

州靈僊觀卒
年六十三

介亭

真人昔未起奔鹿駭四方連天目山兩乳百里長有
地跨江海無種生侯王中宵燎穹旻列石表壇場朱旗
大梁野英氣吞八荒寥寥百年後故物亦已亡所餘彼
巉巖峰巔屹相望主人承明老星斗工文章築亭紫霄
上坐客蒼株旁攀雲弄明月曉星生扶桑禹山隔波濤
簡書永埋藏願逢希夷使水土還故常

李鷹

字方叔其先自鄆徙華鷹六歲而孤能自奮立稍長以學問稱鄉里謁蘇軾于黃州贊其文軾曰子之才萬人敵也鄉舉試禮部軾典貢舉遺之賦詩自責謀諸范祖禹將同薦之會相繼去國不果軾亡鷹哭之慟作文祭之曰皇天后土鑒一生忠義之心名山大川還萬古英靈之氣讀者悚然卒年五十

文選樓

申轅應楚聘鄒枚適梁苑藩侯喜賓客賢賢易鷹犬黃綺遊漢庭羽翼繒繳遠秦府十八公攀附名益顯昭明

梁才子文園俾蒐選高齋切浮雲雉堞俯晴巘尚應媿
河間筆削非大典

驪山歌

君門如天深九重君王如帝坐法宮人生難處是安穩
何為來此驪山中複道連雲接金闕樓觀隱煙橫翠紅
林深谷暗迷八駿朝東暮西勞六龍六龍西幸我肩棧
悲風便入華清院霓裳蕭散羽衣空麋鹿來遊墟市變
我上朝元春半老滿地落花人不掃羯鼓樓高挂夕陽

長生殿古生青草可憐吳楚兩醢雞築臺未就已堪悲
長楊五柞漢幸免江都樓成隋自迷由來流連多喪德
宴安鴆毒因奢惑三風十愆古所戒不必驪山可亡國
書侍兒小瑩裙帶

旋剪香羅列地垂嬌紅嫩綠寫珠璣花前欲作重重結
繫定春光不放歸

張耒

字文潛淮陰人十三歲能文十七作函關賦已傳
人口遊學于陳學官蘇轍愛之因得從軾遊軾稱

其文汪洋冲澹有一唱三歎之致弱冠第進士官
主簿尉丞用范純仁薦為祕省正字厯著作郎史
館檢討擢起居舍人紹聖初坐黨籍連貶徽宗立
召為太常少卿復坐黨籍落職言者謂未聞蘇軾
計舉哀行服遂貶房州別駕
晚監南嶽廟卒年六十一

夏日書懷

士而懷其居孔子亦云非賢臣事晉侯夜載使逃齊酖
毒比燕居君子不可懷樂小必害大安近遠之迷野芻
養騏驥當念和鑾馳一飽願即止幾何非犬雞高賢意
有在汲汲不敢違安能守槽枥長伴兒曹嬉

感遇

穰侯擅關中頗畏諸侯客
慘車計已遲終困范公策
庸夫吞富貴百計私自惜
勢移禍敗至智巧竟何益
至公覽英俊苴補乃無隙
請看桑林餓亦脫趙子厄

斑竹

重瞳陟方時二妃蓋老人
安肯泣路傍洒淚留叢筠
頗疑葛陂化點點留斑鱗
慎勿脫水去人世多埃塵

糴官粟有感

持錢糴官粟日夕擁公門官價雖不高官倉常苦貧兼
并閉困廩一粒不肯分伺待官粟空騰價邀吾民生視
既不可禁之亦紛紜擾擾田畝中果腹才幾人我欲究
其原宏濶未易陳哀哉天地間生民常苦辛

離黃州

扁舟發孤城揮手謝送者山回地勢卷天豁江面瀉中
流望赤壁石脚挿水下昏昏煙霧嶺歷歷漁樵舍來此
實三載鄰里通假借別之豈無情老淚為一洒篙工起

鳴鼓輕櫓健如馬聊為過江宿寂寂樊山夜

晚歸寄無咎

屋東雲移山屋西日半壁餘天一劍青遠雨萬絲白官
事癡可了未遭官長責惟應晁夫子不可別頃刻

廣化遇雨

浮雲蔽高峰臺殿延晚色風聲轉谷豪雨脚射山白東
樓瞰虛明龍甲排檜栢蕭森異人境坐視動神魄撞鐘
寺門掩晚霽尚殘滴相攜下山去塵靜馬無迹歸來解

鞍歇新月如破壁但恐桃花源回舟已青壁

贈無咎 三首

文風還正始磊落有諸君長者進後生亦使我有聞譬
如狸與虎偶使並稱文終然不可及困我力空勤
觸有羸其角進有跋其胡膏車秣吾馬白日在脩途雖
乏無何杯頗多未見書力學致事功良田本深鋤
黃子少年時風流勝春柳中年一鉢飯萬事寒木朽室
有僧對談房無妾持帚此道人人事誰令余獨不

阿儿

小兒名阿儿眉目頗疎明日來書案傍學我讀書聲男
兒事業多何必學讀書自古奇男子往往羞為儒阿儿
笑謂爺薄雲無密雨看爺饑寒姿兒豈合貴富翁家破
篋中惟有書與史教兒不讀書更欲作何事

寓陳雜詩

三首

朝雨如棼絲咫尺不相辨俄然晨光漏紺碧出天面天
工易明晦頃刻俄屢變今朝事大定雲物卷組練客有

北來說蠅生被數縣穀穗無一粒遺得如立箭卑田成
大澤投種哀莫見官人惜不知猶喜輸租辦興懷及鰥
寡獨愧吾飽飯

秦子死南海旅骨還故墟辛勤一生事空得數篇書琅
琅巧言語玉佩聯瓊琚知者能幾人憎者頗有餘書生
事業薄生世苦勤劬持以待後世何足潤槁枯興懷及
平昔使我涕漣如道路阻且長悲哉違撫孤

開門無客來永日不冠屨客知我老懶投刺輒復去端

成兩相忘因得百無慮故人在傍郡書信不能屢興哀
東坡公將拵邨山墓不能往一慟名議真有負可能金
玉骨亦逐黃壤腐但恐已神僊裂石終飛去

寄答參寥

我生為文章與衆常不偶出其所為詩不笑即嘲詬少
年勇自辯盛氣爭可否年來知所避不敢出諸口時時
未免作包以十襲厚低心讓兒曹默默衆人後見君不
能已頗亦陳所有君豈少取之時以佳句授幽絃喜有

聽清唱慰孤奏如何瞥然去使我不得友

夏日雜感二首

羣動入夜息我歸亦安眠脫我身上衣投枕體宴然朝
日常營營有生不可閒義和戢其光幸此須臾閒人生
一世中大小無百年胡為不自暇長抱勤苦歎才者勇
設施誕者夸死權彼有驅其心欲休諒無緣我本與世
疎少慵老成頑何為不引去坎軻行所艱

娟娟檐前月雖缺自娟好團團理絲蟲養身恃其巧無

能老蝙蝠乘夜出堂與那能捕飛蚊未解聒耳鬧悲歌
草間蚓辛苦自鳴噪爾生可以默何所欲而噪鳴哇訴
其渴謂若天可禱瘖蟬死不鳴豈以訴無效悠悠羣動
情誰能辨醜好我歌豈徒然亦用自警告

冬日放言

二首

秦人焚詩書意欲遂絕滅六經至今存何曾損豪髮興
哀有天理人力自淺拙不憂驪山墓回首遭發掘

元子本豪爽頗復有俗氣孟嘉亦可人乃與較權勢崛

強盡百年究竟成何事江左無英雄汝得免徒隸

潘郎以予生日見過致酒出兩詩

東風沛甘雨百物一時好江邊桃李盡紅紫到百草道
傍負擔子寒食歸祭禱念我淮上丘三年不躬掃

淮陽牡丹窟盛不數伊洛姚黃一枝開衆艷氣如爍亭
亭風塵表獨立朝萬萼誰知臨老眼更復美葵藿

于湖曲

并序

蕪湖令寄示溫庭筠湖陰曲其序乃云晉王敦反屯

于湖陰帝微行至其營敦夢日遠之覺而追不及故
樂府有湖陰曲按晉地志有于湖而無湖陰本紀云
敦屯于湖陰察營壘而去余頃遊蕪湖問父老湖陰
所在皆莫之知也然則帝至于湖當為斷句乃作于
湖曲以遺之使正其是非云

武昌雲旗蔽天赤夜築于湖洗鋒鏑巴滇駮駿風作蹄
去如滅沒來不嘶日圍萬里纏孤壁兵氣如霜已潛釋
蛇矛賤士識天顏玉帳髯奴落妖魄君不見銅駝陌上

塵沙起朔騎春來飲渥水浮江天馬是龍兒蹙踏揚州
開帝里王氣尚縣五百秋弄兵老漚空白頭石城戰骨
卧秋草更欲君王分上流

蘇叔黨呂知止自許下見訪叔黨有詩見贈賦此
奉答

三年齊安看江山可當中原故人面北來塵埃逢故人
眼前却作江山見君似江山定不踈能出吾言世亦無
蘇郎下筆妙無敵呂郎與談驚未識鳳雛驥子未宜輕

囊空各有千金壁，贈君錦繡英瓊瑤。
報我琅玕金錯刀，溪毛橫汙未相棄。
歲暮與君甘緼袍。

少年行

少年賣珠登主門，主家千金惜一身。
綠韉請罪見天子，尚得君王呼主人。
鬪雞走馬長安道，豪傑驅來奉談笑。
漢庭碌碌公與侯，畏禍憂誅先白頭。

代贈

洞房飛香作春霧，僊人勸酒香中語。
明眸第二紫雲娘。

鶯學歌聲柳如舞
蹙眉長歌澧有蘭
銀勾請君春草篇
繁絃高張燭燒夜
玉壺未盡參在天
春泥雪消淮上路
東風浪欲驚客櫓
惱公舊事幾魂夢
過眼相逢一風雨
黃流清洛上天漢
吳山洞庭藏水府
謾題詩句寄歸舟
江口風狂那得渡

片雪歌

瑤池一片孤飛雪
風急身輕飛不歇
誰將翠袖遮得歸
十斛明珠換與誰
金龜貴客迎將去
玉作輜輶載烟霧

人間不解桃李心獨與琵琶自相語主人白頭情不親
朱樓夜鎖梨花春願同花落寄流水飄出朱門隨路塵
長恐此生空已矣從此失身輕薄子人生但樂兩心知
誰是瓊瑤孰泥滓鶯鷺中彈花辭樹蝶散蜂稀春日暮
風光不斷流水長不知片雪今何處

飛螢詞

碧梧含風夏夜清林塘五月初飛螢翠屏玉簾起涼思
一點秋心從此生方池水深溪雨積上下輝輝亂凝碧

幸因簾捲到華堂，不畏人驚拂瑤席。漢宮千門連萬戶，
夜夜熒煌暗中度。光流太液池上波，影落金盤月邊露。
銀闕蒼蒼玉漏遲，年年為爾足愁思。長門怨妾不成寐，
團扇美人還賦詩。避暑風廊人語笑，欄下撲來羅扇小。
已投幽室自分明，更伴殘星碧天曉。君不見連昌宮殿
洛陽西，破瓦頽垣今古悲。荒榛腐草無人跡，只有秋來
熠燿飛。

偶書 三首

秋陰漫漫幾千里赤壁磯前天接水連檣接柁不復行
老魚擘波時出戲黃橙紫栗收如積青錢買酒不堪惜
北人歲久厭南餐山邊有路何時還

窮秋晝夜陰如一夜不見星朝蔽日枯疇已獲大野空
怒江未落連州沒長魚撥刺不受釣漁子高眠守蓬蓽
紫髯舊宮誰復遊鼎峙雄心久蕭瑟

周郎戰處滄江回魚龍蕩滴山石摧荊州滕艫莫舉楫
走君不勞一炬灰當年雄豪誰復在喬木荒煙忽千載

斲竹截作寸笛材一寫山川萬古哀

勞歌

暑天三月亢無雨雲頭不合惟飛土深堂無人午睡餘
欲動身先汗如雨忽憐街里負重民筋骸長轉十石弩
半衲遮背是生涯以力受金飽兒女人家牛馬繫高木
惜恐奔驅犯炎酷天工作民良久難誰知不如牛馬福

江南曲

江浦芽白水江綠江頭花開自幽淑人家晨炊欲熟時

旋去網魚惟所欲往來送租只用船未省沙泥曾汙足
有錢買酒醉鄰里終日數口常在目不學長安賈公卿
每遣離心寄朱轂朝遊巖廊暮海島謫人未歸心自逐
牧牛兒

牧牛兒遠陂牧遠陂牧牛芳草綠兒怒掉鞭牛不觸澗
邊柳古南風清麥深蔽目田野平烏犍礪角逐草行老
特卧噉饑不鳴犢兒跳梁沒草去隔林應母時一聲老
翁念兒自攜餉出門先上岡頭望日斜驟雨濕蓑衣拍

手唱歌尋伴歸遠村放牛風日薄近村牧牛泥水惡珠
璣燕趙兒不知兒生但知牛背樂

讀中興頌碑

玉環妖血無人掃漁陽馬厭長安草潼關戰骨高於山
萬里君王蜀中老金戈鐵馬從西來郭公凜凜英雄才
舉旗為風偃為雨洒滌九廟無塵埃元功高名誰與紀
風雅不繼騷人死水部胸中星斗文太師筆下蛟龍字
天遣二子傳將來高山十丈磨蒼崖誰持此碑入我室

使我一見昏眸開百年廢興增歎慨當時數子今安在
君不見荒涼渢水棄不收時有遊人打碑賣

魯直惠洮河綠石作冰壺研次韻

洮河之石利劒矛磨刀日解十二牛千年荒徼困沙礫
一日見寶來中州黃子文章妙天下獨駕八馬森幢旒
平生筆墨萬金直竒煤利翰盈筐收誰持此研參案几
風瀾近手寒生秋包持投我棄不惜副以清詩帛加璧
明窓試墨吐秀潤端溪歙州無此色野人齋房無玩好

慙愧衣冠陳裸國
晁侯碧海為文詞
盤礴萬頃澄清漪
新篇來如徹
扎箭勁筆更似畫
沙錐知君自足報
蒼壁愧我空賦瓊瑰詩

福昌秋日效張文昌

二首

秋野無人秋日白
禾黍登場風索索
豆田黃時霜已多
桑蟲食葉留空柯
小蝶翩翩晚花紫
野鷄啄粟驚人起
洛陽西原君莫行
秋光處處傷人情

黃桑蕭蕭秋水清
田中日午村鷄鳴
場邊九月禾黍熟

空原雉飛飽新穀
桑籬蟲鳴村路曲
道邊古墳生野菊
人稀田濶草茫茫
洛陽秋深能斷腸

題韓幹馬圖

頭如翔鸞月頰光
背如安輿鳬臆方
心知不載田舍郎
猶帶開元天子紅
袍香韓幹寫時國
無事綠樹陰低春
晝長兩髯執轡儼
在傍如瞻馳道黃
屋張北風揚塵燕
賊狂廐中萬馬歸
范陽天子乘驃蜀
山路滿川苜蓿為
誰芳

閬沙阻風

大江春風浪如屋客舟迎風閬沙宿連檣接柁古岸傍
岸頭無人春草綠船頭日出炊煙起買魚攜菜來就市
漁人水惡不出門蕭條野市無雞豚堤邊紙錢灰若雨
洗酒賽神巫降語南人艇子不避風橫江五兩翩翩去
北鄰賣餅兒每五鼓未旦即遶街呼賣雖大寒烈
風不廢而時略不少差因為作詩且有所警示

桔杓

城頭月落霜如雪樓頭五鼓聲欲絕捧盤出戶歌一聲
市樓東西人未行北風吹衣射我餅不憂衣單憂餅冷
業無高卑志當堅男兒有求安得閒

讀蘇子瞻韓幹馬圖

我雖不見韓幹馬一讀公詩如見者韓生畫馬常苦肥
肉中藏骨以為奇開元有臣善司牧四十萬匹屯山谷
養之罕用食之豐力不曾施空長肉韓生圖像無乃然
我謂韓生巧未全君不見昔時騏驎人未得饑守鹽車

唯有骨昂藏不受塵土侵伯樂未來空佇立騏驎乏食
肉常腥韓生不寫瘦馬駒誰能為驥傳之圖不如凡馬
飽青芻

再和馬圖

我年十五遊關西當時唯揀惡馬騎華州城西鐵駿馬
勇士十人不可羈牽來當庭立不定兩足人立迎風嘶
我心壯此寧復畏撫鞍躡韉乘以馳長衢大呼人四走
腰穩如植身如飛橋邊爭道挽不止側身逼墮壕中泥

縣空十丈才一擲我手失轡猶攢蹄迴頭一躍已在岸
但見滿道人嗟咨關中平地草木短盡日散漫游忘歸
驅馳寧復受鞭策進止自與人心齊爾來十年我南走
此馬嗟嗟入誰手楚鄉水國地卑汙人盡乘船馬如狗
我身未老心已衰夢寐時時猶見之想圖思畫忽有感
况復慷慨吟公詩達人遇境貴不惑世有尤物常難得
寧能使我即無情搔首長歌還歎息

郭圓送蕪菁感成長句

蕪菁至南皆變菰菰美在上根不食瑤簪玉筍不可見
使我每食思故國西鄰老翁知我意盈筐走送如雪白
蒸烹氣味元不改今晨一餐和南北孔明用蜀最艱窘
百計拮拾無遺策當時此物助軍行渭上褒中有遺植
英雄臨事究瑣屑終服奇才屈彊敵想見躬耕自灌畦
當時有意誰能測

蕭朝散惠石本韓幹馬圖馬亡後足

世人怪韓生畫馬身苦肥幹寧忍不畫驥骨當時廐馬

君未知開元太平國無事戰馬卷甲飽不騎王關案駝
通萬里長安第宅連諸娖笙歌錦繡遍一國六龍長閤
空食粟霜甜秋草沙苑遊日暖春波渭川浴睢圓腰穩
目生光細尾豐膺毛帖肉珠鞍玉韁驕不行豈有塵埃
侵四足韓生丹青寫天廐磊落萬龍無一瘦豈知車下
骨如牆饑齧草根刺傷口君家古圖才半身千里騰驤
已有神迴身側顧不無意剪駿絡頭嗟失真君不見太
宗戰馬拳腹毛身騎此馬縛羣豪龍虎精神金鼓氣豈

有閒地供脂膏至今畫圖快胃臆想見虬鬚親破賊那
知但愛廐中肥漁陽筋脚蹄如石神駒入水隨煙雲蜀
山石路無行人六驥悲鳴足流血騎驪遺事一酸辛

奉先寺

荒涼城南奉先寺後宮美人官葬此角樓相望高起墳
草間栢下多石人秩卑埋骨不作塚青石浮屠當丘墳
家家墳上作亭亭朱門相向無人聲樹頭土梟作人語
月黑風悲鬼搖樹宮中養女作子孫年年犢車來作主

廢后陵園官道側家破無人掃
陵域官家歲給半千錢
街頭買餅作寒食

田家

野塘積水綠可染
舍南新柳齊如剪
去冬雪好麥穗長
今日雨晴初擇繭
東家饋黍西舍迎
連臂踏歌村市晚
婦騎夫荷兒扶翁
月出橋南歸路遠

海州道中

二首

孤舟夜行秋水廣
秋風滿帆不搖漿
荒田寂寂無人聲

水邊跳魚翻水響河邊守罾茅作屋罾頭月明人夜宿
船中客覺天未明誰家鞭牛登隴聲

秋野蒼蒼秋日黃黃滿田蒼耳長草虫吟吟鳴復咽
一秋雨多水滿轍渡頭鳴春村徑斜悠悠小蝶飛豆花
逃屋無人草滿家累累秋蔓縣寒瓜

女几祠下

山邊白雲間不掃山下松花龍甲老東風古栢吹暖香
廟前土馬荒春草朝霞為裳水為珮守廟千年老龍在

清風掃堂神欲還
山頭月出溪潺潺

從黃仲閔求友于泉

炎暑戰已定
清秋當抗衡
碧雲生雁思
幽草見蛩情
晒麥村墟靜
觀書枕簟清
誰能酌玄酒
來破屈原醒

贈陳履常

勞苦陳夫子
欣聳病肺蘇
席門迂次數
僧米及時無
盲蓄親庖急
青錢藥裏須
我場方不給
何以繫君駒

至安化驛先寄淮陽故人

蕭條安化驛倦客思悠哉積水連天濶青山送客來疎
籬風捲葉敗屋雨生苔寄語淮陽舊人今放逐回

酬同年徐正夫司戶時欲築室嵩洛間

少別老相見無言空惘然功名屬多病詩酒樂衰年
厭顏公粥囊須趙壹錢歸裝何日辦蒿少好林泉

破幌

破幌一點白卧知千里明低窻通雪氣喬木尚風聲傳
柝軍城靜鳴鐘梵刹清高眠尋斷夢鄰樹已烏驚

秋懷 三首

木落晚風急，宵涼侵暑衣。
有期惟向老，無計未成歸。
只益顛毛脫，還從髀肉肥。
感時仍弔古，回首意多違。

衰鬢不堪洗，病軀先覺陰。
天寒白日短，歲暮亂山深。
薄酒醒無力，危絃奏不禁。
謀身老逾拙，三聽洛陽砧。

清秋萬里興，力疾上高臺。
歲熟雉兔飽，風高榆柳摧。
晚篁元自綠，幽菊為誰開。
寂寞無人問，鄉書久不來。

宿銅陵

山色日已遠問人歸路長碧天涼後濶秋物雨餘荒人
靜路傍寺鳥啼林下房銅陵竟何就空死漢吳王

冬夜

山靜寒雲薄天空孤月明霜桐占堦影風葉繞廊聲經
濟心難就蹉跎歲屢更冥鴻本清遠何事亦宵征

和西齋

山色供開鏡溪光照掩扉暗蟲先夜響菱葉近秋飛灌
壠晴蔬出窺籠暮鶴歸鳴琴坐朗月輕露點秋衣

春寒

客舍逢桃李清尊聊自懽
夢中驚夜雨醉裏度春寒
草色遠還綠鳥聲晴更繁
預期多病眼花發莫辭看

歲暮書事

二首

歲晏北風疾山空萬谷號
木枯隨意折鴻斷不成高
深屋支蓬戶溫爐暖緼袍
老天元不寐鳴竹鼓蕭騷

原廟依岡起傳為世祖營
南陽無雉雉熊耳合投兵
霜日蓬原路天風栢殿聲
山川英氣在不負昔聞名

宿東魯父店

郡國何時極羈愁觸處生望隨天不盡春共野兼平煙
樹淮南濶漁鹽楚俗輕飄零五年別歎息鬢毛更

春望

暖日晴熏草清淮濶浸天地卑連遠水城廢入春田目
極風燈外愁縣淚臉邊人生苦多感花柳自年年

同七兄及崧上人自墳莊還寺

和風快人意岸幘晚衿涼日落野痕碧月生淮際光論

詩得靈運靜語屬支郎不是耽閑散從來懶性長

蔡河漲

渾渾雖未已浩浩竟東歸濶處長天近澄邊一鳥飛西
風疎葦亂斜日遠村微淹泊從吾道扁舟伴釣磯

泊長平晚望

江穩夷猶擢春歸杳靄天翠深交岸樹綠遠望川田漁
酒數家市帆檣何處船登臨一回首無恨亦依然

夏日 三首

蚓壤排晴圃。蝸涎印雨堦。花鬚嬌帶粉。樹角老封苔。問
字病多忘。過隣慵却迴。晚涼還盥櫛。對竹引清杯。

細徑依原僻。茅蓬四五家。山田來雉兔。溪雨熟桑麻。竹
籠辰收果。茅菴夜守瓜。頗知農事樂。從此問生涯。

夜色川原合。秋聲草木催。星辰隨地濶。河漢抱山來。栖
鶴涼先警。饑鳥夕未回。高樓對斜月。鳴笛正清哀。

冬日雜興 三首

池館留餘雪。西山照夕曛。臘催梅藥迸。春向鳥聲新。愁

思仍當病風光欲近人
年年桃李樹相對只傷神
南壁蒼崖壯窮冬井落閤
風聲先老樹日色避諸山
落雁饑相向啼烏夕自還
微微寒月影蓬戶已深闌
擊柝山城閉疎燈野店扃
疾風鳴夜谷晴水動浮星
霜翼歸何晚鄰機織未停
短歌時自和愁絕更誰聽

建平途次

野橋田徑滑官路柳條新
流水伴遲日野花留晚春
點空知去翼衝綠有歸人
自笑諳岐路無勞更問津

暮春

夜雨輕寒拂曉晴牡丹開盡值清明
庭前落絮誰家柳葉裏新聲是處鶯
白髮欲來如有信青春歸去更無情
便當種秫長成酒遠學陶潛過此生

夏日雜興

墻下溪流清且長夾溪喬木雨蒼蒼
裊風翠果擎枝重照水圓荷舞葉涼
蝸殼已枯黏粉壁燕泥時落污書牀
南山野客閒相過贈我能攜藥滿筐

屋東

蒼鳩呼雨屋東啼
麥穗初長燕子飛
竹裏人家雞犬靜
水邊官舍吏民稀
溪聲夜漲寒通枕
山色朝晴翠染衣
賴有西隣好詩句
賡酬終日自忘饑

登海州城樓

城外滄溟日夜流
城南山直到城樓
溪田雨足禾先熟
海樹風高葉易秋
疎傳里閭詢故老
秦皇車甲想東遊
客心不待傷千里
檻外風煙盡是愁

京師廢宅

當道朱門白晝扃高堂歌吹久無聲古窓積雨昏殘畫
朽樹輕陰長寄生門下老人時洒掃舊時來客歎平生
艷姬驕馬知何處獨有庭花春自榮

登城樓

沙雨初乾巾褐輕獨披蓑蔓步高城天晴海上峰巒出
野暗人家燈火明歸鳥各尋芳樹去夕陽微照遠村耕
登樓已恨荊州遠况復安仁白髮生

送泗州推官王永年致仕還鄉王年四十而致仕
士大夫所少也

為憶田園便拂衣休官退勇似君稀塵埃擺脫青衫去
間里驚嗟黑髮歸南畝稻糧仍歲熟舊山芝朮入秋肥
百年從此皆閑日寄語人間浪是非

自海至楚途次寄馬全玉

蕭蕭晚雨向風斜村遠荒涼三四家野色連雲迷稼穡
秋聲催曉出蒹葭愁如夜月長隨客身似飛鴻不記家

極目相望何處是海天無際落殘霞

夏日

黃簾翠幔斷飛蠅午影當軒睡未興枕穩海魚鵲紫石
扇涼山雪畫青繒廊陰日轉雕欄樹坐冷風生玉盃冰
滿案詩書塵蠹甚故應疎懶過炎蒸

遣興和晁應之

蓬門烏雀啁黃昏歸遲牛羊各有羣水濶蛟龍陰後出
山空虎豹夜深聞西來谷引秦川雨南去秋連楚澤雲

唐漢廢興無處問西風禾黍但丘墳

渡洛因泛舟東下數里頗憶淮上

汭汭清洛轉山隈渺渺東流不復回輕鳥竟隨青嶂去
亂波爭泛夕陽來偶驚舟楫鄉心起乍脫塵埃病眼開
疑是盱眙郭門外月明帆席過清淮

和周廉彥

山光不動晚雲垂芳草初長觀馬蹄新月已生飛鳥外
落霞更在夕陽西花開有客時攜酒門冷無車出畏泥

修禊洛濱期一醉天津春浪綠浮堤

春日遣興

流光向老惜芳菲搔首悲歌心事違
綠野染成延晝永亂紅吹盡放春歸
荆榛廢苑人閒牧風雨空城鳥夜飛
斷送一番桃李盡可憐桑柘有光輝

卧病月餘呈子由

風葉鳴窻已復朝喚回歸夢故山遙
酒壺暗淡浮塵集藥鼎青瑩敗葉燒
閉戶獨依寒蟋蟀移牀更就雨芭蕉

病深欲請安心術長日如年未易消

次韻張公遠

平淡春雲捧額浮秋光劒戟近人流無腸可斷方為恨
有藥能治不是愁欲待挑琴聊試術未傳驅豆更何謀
遙知添得寒窻夢尤在華堂綺席頭

雙槐晚秀三月一日初見新葉

東皇無處著繁華亦復分張到我家他日老蒼悲敗枿
今晨嫩綠出新芽禿翁承弁纖纖髮村婦縈鬟草草花

桃李蹊中人迹絕綠陰門巷正藏鴉

登山望海

鳥去蒼煙古木人歸綠野孤舟信美雖非吾土消愁且

復登樓

雪溪道至四安鎮

苔雪清秋水底天夜帆燈火客高眠江東可但鱸魚美
一看溪山直萬錢

上元都下二絕

淡薄晴雲放月華
晚粧新暈臉
邊霞
管絃樓上爭酤酒
巧笑車頭旋買花

驕馬金鞭白面郎
雙鬟小女坐車箱
輪聲轆轤歸何處
留得紅籠絳蠟香

傷春 二首

浮雲冉冉送春華
怯見輕寒日欲斜
半夜雨聲能幾許
曉來落盡一城花

嫩紫妖紅惜不得
亂隨風雨點蓬蒿
荒田野草花開晚

主管春光屬爾曹

春雨中偶成

春陰只與睡相宜
卧聽鳴禽語復飛
一縷斷香浮不散
何人深院畫熏衣

懷金陵 二首

壁月瓊枝不復論
秦淮半已掠荒村
青溪天水相澄映
便是臨春閣上魂

曾作金陵爛漫遊
北歸塵土變衣裘
芰荷聲裏孤舟雨

卧入江南第一州

宋元詩會卷二十六

欽定四庫全書

宋元詩會卷二十七

兵部主事陳焯編

賀鑄

字方回衛州人孝惠皇后之族孫也長七尺面鐵色喜談時事可否不少假借博學彊記工詩文尤善于度曲化陳語為新奇出人意表其氣概雄爽近于任俠初娶宗人女隸籍右選監太原工作元祐中李清臣執政奏換通直郎通判泗州又倅太平州以尚氣使酒不合于時退居吳下自號慶湖遺老以終有集二十卷

故鄴

按鄴都記漢建安十二年曹操滅袁氏始大築鄴當時京兆洛陽南陽許皆大都而鄴為之長操子丕代漢復定都洛陽此後僭竊更據鄴而未始殘破元魏孝文帝自代南巡駐蹕鄴下久之以南望枉人山北接栢人縣非善地遂去之河南將行挂飯罍于城樓上識者解之挂飯縣飧也豈待玄孫宅此乎至孝靜帝果為高歡劫遷都鄴齊五主營建宮室規模壯麗

逾前魏周武平齊焚撤略盡及隋文克尉迥遂滂渚
之築京觀于葛屨山徙郡治安陽鄴猶為屬邑熙寧
間始廢之戊午九月獨遊晚歸馬上賦

魏武昔恢圖北平譚尚孳卜鄴築新都非徒為三穴將
行遷鼎志遽有分香訣落日總帳空莫終歌舞闋旋輦
漚洛上載起蒼龍闕四葉不歸東苔花馳道絕食槽識
終驂挂飯期先決擾攘百年間累車尋覆轍山川氣象
變朝市繁華歇白露復青蕪茫茫換時節陰風吹葛屨

燐火走兵血木葉下西陵寒蟲助騷屑

燭蛾

雙蛾來翩翩慕此堂上燭附炎竟何功自取焚如酷感
彼萬動微保生在無欲不見青林蟬飲風聊自足

題蘭陵王碑陰

碑載王名肅字長恭北齊文襄之子王有武略善撫
士每得一瓜數李必分甘餌衆金墉之戰免胄先登
推功第一今蘭陵王曲卽凱歌也為後主所忌得疾

不治而卒以鳩薨墓在淦陽西南十里碑字大兼分
隸法有古氣而不著書人名文乃盧思道也

齊室生武賢蘭陵類頗牧析瓜饗虎士饜慰比梁肉金
墉免胄戰破陣何神速樂府有遺聲當歌凱旋曲磐宗
既不壽霸祚宜爾促十代六百年人間變陵谷荒塗接
幽壠誰復禁樵牧寔石半歌摧鉤鋤斷鼃足蒼苔蝕篆
刻仰睇眩塵目操翰無媿詞千言不為辱人生妄區別
共盡同草木何待雍門彈令君淚盈掬

冠氏送武欽之安陽

黃金絡征轡之子待明發樽酒少遲留
禪林見涼月歌
鬟結蛾黛怨此佳期濶去去柳堤風青蟬催白髮

遊雲龍張氏山居

雲龍山距彭城郭南三里郡人張天驥聖塗築亭于
西麓元豐初郡守眉山蘇公屢登燕于此亭下畜二
鶴因以放鶴名亭復為之記亭下有小屋曰蘇齋壁
間榜眉山所留二詩及畫大枯株亦公醉筆也壬戌

秋余初至徐張惠然見臨繼相招為山中遊

昔聞張逸民卜築雲龍山東望結遐想喜得彭城官一
語定襟契宛如平生歡招攜屬休沐投此蘿薜間女僕
候門巷青桂雙翠鬟蘇齋軒戶明餅火焚椒蘭寶墨鬼
神護清詩冰玉寒森然拱簷雷架石排琅玕東趨放鶴
亭磴道披茅菅指顧百村落炊烟林莽間日脚灑平陸
兩山如斷環淒風振晚葉坐怯衣裘單引領紫霄極飄
飄如可干緬懷眉山公五馬來遊盤酣興走顛筆蒼崖

即鏡刊午年仲冬月雪野雲彌漫掃石坐舒嘯惠泉烹
鳳團當時詫盛集千古陋遠安俛仰迹遂陳斯人久泥
蟠我來後千日逸躅何由攀仰懷勝事往俯遵塵路還
山英能不辱時款白雲關

登黃樓有懷蘇眉山

登黃樓望黃州黃州望不見樓下水東流水流何可留
浮雲更悠悠傷心澤畔客憔悴楚蘭秋

和張謀父遊石佛山觀魏太武書

按南北史彭城圖經魏太平真君十一年太武南侵
至瓜步築宮駐蹕聲欲渡江宋人患之遣使請婚饋
百牢以犒師明年春旋師渡淮復留連徐方再旬始
北去今彭城南五里因山鑿佛高十許丈東北百步
有大磐石欹枕小溪劃然四字曰阿彌陀佛皆徑尺
餘蓋當時太武以鐵筆畫是字非刊刻也乙丑秋張
謀父賦詩要余屬和焉

中區昔屯否代邦天所開鴻圖屬太武不世英雄才南

洗洛陽血西盪長安灰
羶車十萬乘略地驅風雷
一輦濟長淮築宮瓜步隈
東隣拜牢餽走使為婚媒
雲旗即歸路覽勝此徘徊
俯揮鐵馬鞭頑石同陶坏
劃成四大字屹栗陰虹摧
淪精入崖壑怒氣羞蟠回
茫茫六百年風雨生莓苔
偉蹟寢銷泯威靈安在哉
君為訪古遊賦詩追七哀
人生誰不爾零落同塵埃

登金陵雨花臺

迢迢朱雀航飛蓋共凌越
東風石子岡芳草微徑絕
生

公法堂在清夜貯明月回認城郭遊春萼爛晴雪長煙
動江隩微雲起山脅連檣去遲回白鳥屢明滅

遊百福寺即唐詩人張司業藉故居

文昌西郭居脩竹閑環堵琴樽不復存青蓮開梵宇塵
紛晦遺像粉繪才可覩拜奠愧無言長哦古樂府

金山

輕舸放中冷岸遠春風壯檝師俯仰呼天水爭簸蕩吾
方扣其舷聊賡小海唱梢回即東麓側磴聯履杖危剝

表層巔疲筋躡牽彊斜廊繚複殿魚脊分背向放目四
垠寬秋毫入吾望侵雲鐵甕壘崛起無緣傍映日海門
山不帶滄波上吾雖百石吏平昔有微尚俄得金仙徒
翦蘿開岫幌誓投桑榆年浮玉翁自況

和潘幽老漢上屬目

浮雲蒙山頭清川山下流芳洲采香女薄暮漾歸舟並
蒂雙荷葉逢迎一障羞持情不得語大婦在高樓

望夫石

亭亭思婦石下閨幾人代蕩子長不歸山椒久相待微
雲蔭髮彩初月輝蛾黛秋雨疊苔衣春風舞蘿帶宛然
姑射子矯首塵冥外陳跡遂無窮佳期曾莫再脫如魯
秋氏妄結桑下愛玉質委泥沙悠悠復安在

寄題潯陽周氏濂溪草堂

江華人周茂叔仕至尚書郎累使嶺表中年投節退
居湓城之南溪上因名濂溪以自況二子壽字元翁燾
字次元相踵第進士丙子五月余艤舟漢陽始與元

翁相際求余賦詩

濂溪之水清未足濯公纓平生抱苦節成就此溪名長
歎置符傳孤雲歸思輕溪頭四壁居溪下百畝耕量汲
奉晨盥課樵共夕烹希逢杖屨遊但聽絃歌聲為客開
三逕傳家惟一經雙珠光照乘合璧價連城褐被有餘
樂問縑無隱情昔仰名父子今推難弟兄不應文範後
遽謂公慙卿勒詩高崖石敢告後代生

彭城三詠

元豐甲子余與彭城張仲謀父東萊寇昌朝元弼彭
城陳師仲傳道臨城王適子立宋城王壯文舉采徐
方陳迹分詠之余得戲馬臺斬蛇澤歌風臺三題即
賦焉

秦蛇已中斷劉項方龍戰叱咤沮風雲睢盱走霆電鴻
溝一畫天地開楚王洗劍東歸來新都形勝控淮泗籠
山絡谷營高臺重瞳登覽何為者不知招賢知戲馬上
如激矢下投丸蘭筋霜腕便回盤半夜悲歌雕不逃明

日陰陵行路難
駢北三千歸漢苑
粟豆尤聞蠹縣官
君不見華山之陽
古垌牧春風吹草
年年綠

右戲馬臺

君不聞泗濱昔日
有亭長送徒咸陽
失收掌澤中置酒
飲相訣吾亦從茲
犇芒碭陰風蕭蕭
導者懼前有脩蛇
怒橫路酒酣拔劍
肯留行劃斷蜿蜒
不回顧河明月出
人踵來彼媼何冤
號且哀謂遭赤帝
屠吾子語竟莫知
安在哉真人聞此
自心許茫茫四海
吾其主虎變龍飛
十二年馘項泉英
直孤鼠半夜雄鎧
飛上天幾見長陵

一坏土

右斬蛇澤

漢祖高風百尺臺千年客土生蒿萊無窮人事水東去
如故地形山四來江淮猶沸鯨鯢血八十一車枉歸轍
白叟逢迎皆故人斗酒歡呼惜將別崢澠迢遙非我鄉
死生此地烏能忘酒闌鳴筑動雲物青衿兒曹隨抑揚
爾時可無股肱力端思猛士守四方君不聞淮陰就縛
何慷慨解道烏盡良弓藏

右歌風臺

江南曲

遊倡寨杜若別浦鴛鴦落向晚鯉魚風客棹千里泊當時桃葉是新聲千載長餘隔水情烏衣巷裏人誰在白鷺洲邊草自生

留別僧訥

穴從西班牙誰比數牛僧馬醫猶爾汝詩解窮人未必工苦調酸聲效梁父榮陽道人方外交謂我有言追屈騷驪珠不惜彈黃雀狗尾何堪睽黑貂秦淮潮上扁舟發後日相思一書札千里同風了了然人間無處無明月

叢臺歌

累土三百尺流光二千年人生物數不相待推顏故址
秋風前武靈舊隴今安在禿樹無陰困樵采玉簫金鏡
未銷沈幾見耕夫到城賣君不聞叢臺全盛時綺羅成
市遊春暉一從凋輦閉荒草蕭散行雲無復歸招魂想
像風流在晴華露蔓猶依稀縈紆棘逕撩人衣禾黍晚
成豺貉肥層簷碧瓦碎平地夢作鴛鴦逐伴飛登臨弔
古將語誰城郭人民今是非指君看取故時物南有清

流西翠微彷徨華表不能去豈獨遼東丁令威

雨餘晚望

相應乳鳩鳴桑間返照明平津小舫度高隴一牛耕林
數歸心健塵埃病骨輕屈騷魂爽在未許獨君清

自鄆還徐道中

八月過新雨行雲弄晚涼山川乍明晦禾黍半青黃西
去真何事東還非故鄉悠悠塵土裏無路不亡羊

丙寅舟次宋城作

水館雨邊村登臨奈斷魂黃花開小徑紅粉哭高原舟
楫逢新火松楸老故園斜陽一千里依約是蘇門

酬桂林從叔

江到三湘盡山圍八桂深龍蛇寒不蟄霧露晝多陰迢
遞馳梅信殷勤訪竹林淮南風土美留滯亦何心

懷寄潘孝本兼簡其子言

春色先梅嶺秋聲後桂林溪通五羊險雲近九疑陰無
雁難逢信有猿能伴吟燒春酒自美應對阿戎斟

宿黃葉嶺田家

聚落荒山裏畬田歲不登
牛衣障隙雪鼠穴見隣燈
愁入魚難暝寒凝酒亦冰
悵然歌白石推枕待晨興

金陵懷寄歷陽王掾

征魯亭邊路望夫山下舟
長江不隔夢明月祇供愁
促席歌塵斷閒窓醉墨留
惜芳橋畔柳誰繫木蘭舟

秦淮夜泊

官柳動春條秦淮生暮潮
樓臺見新月燈火上雙橋
隔

岸開朱箔臨風弄紫簫誰憐遠遊子心旆正搖搖

秋夜聞雨

故國心馳北扁舟計漫東寒生一夜雨病涉兩秋風落
泊籬根葉幽憂屋角蟲何情悲節物聊自況哀翁

龜山晚泊

春候半寒溫維舟淮上村長林補山罅青草際潮痕久
厭浮家役重招去國魂禪房欲舒寫煙雨促黃昏

江夏寓興

風與檣鳥便儂先塞雁來山經七澤斷潮自九江回漁
父猶知隱騷人枉銜才朋遊正相遠梅信為誰開

病後登快哉亭

經雨清蟬得意鳴征塵斷處見歸程病來把酒不知厭
夢後倚樓無限情鴉帶斜陽投古剎草將野色入荒城
故園又負黃花約但覺秋風髮上生

題永城縣園水亭

詰曲池塘碧玉流襟亭孤占小汀洲長紉座上芳蘭佩

不繫簷前畫鷁舟好泛羽觴修舊事為書繭紙記清遊
季真待得東還日初見紅蕖十畝秋

罷大匠屬為淮南行

何處經行特惘然津頭曾送木蘭船桃花春水生前夜
楊柳秋風憶故年驛路尺書疑斷絕官倉斗米愧留連
飄飄復作江湖計從此長安是日邊

與張歷陽追懷從禽之樂因賦

宜秋門外養鷹坊好草陂頭射雉場油幕氍毹廬張野飲

錦袍貂帽結戎妝興闌落日黃塵斷夢後西風白髮長
誰念江湖獨流寓此情難話與漁郎

歷陽姥磯下馬上有懷京都遊好

楚澤初冬正穫田孤鴻欲下却翻然人煙隱約青山郭
雲物離披小雪天送別盃盤猶昨日勞生鞍馬遂窮年
故人多在金閨籍誰念心如寸斷絃

宿芥塘佛祠壁間得魏湘畢平仲張士宗昔所留
字皆吾故人也

青青甕夾欲抽芒浩蕩東風晚更狂微逕斷橋尋古寺
短籬高樹隔橫塘開門未掃楊花雨待曉先燒栢子香
底許暫忘行役倦故人題字滿長廊

上巳晚泊龜山作

薄暮東風不滿帆遲遲未忍去淮南故園猶在北山北
佳節可憐三月三蘭葉自供遊女佩芸編聊對故人談
洛橋車騎相望客曾為吳兒幾許慙

寄清涼和上人

南國風流百不存石頭今是給孤園山連雉堞斜侵路
潮送漁舟自到門方丈定容居士病貝多應待客兒翻
縣知後日逢迎際桃李春風兩不言

潘幽老出十數詩皆有懷蘇儋州者因賦

人煙寂絕鬼門關更指儋州杳莽間三四月交天漏雨
東南地盡水浮山依迷春草鴿原失響像秋風鶴馭還
回羨河陽賢父子雪堂曾伴十年閒

答致仕吳朝請

潛

登黃鶴樓見招

城隅黃鶴莫登臨，端使悲翁動楚吟。
日下長安人共遠，天圍夢澤歲方陰。
北風欲雪雁飛急，南渚始冰魚伏深。
誰似草堂安隱客，下帷隱几不求心。

高郵舟中對雪

天涯晚歲客無歡，擁鼻微吟行路難。
三楚浮程波渺渺，五陵歸夢雪漫漫。
兔園授簡心猶壯，剡曲拏舟興久闌。
病骨支離仍禁酒，漁蓑重緝待春寒。

廣陵茱萸灣晚泊

冷雲拋雪未成花，過埭東風凍著沙。
荻蒲漁歸初下雁，楓橋市散只啼鴉。
舊聞南國饒春事，行見東風換物華。
老病心情亦何有，藥囊詩卷是生涯。

擬溫飛卿

露網朱甍上，風簾翠幙前。
宿衾熏菡萏，朝鏡拂漪漣。
津潤銷金筆，香依撲粉綿。
度閒雙陸子，撥恨十三絃。
鸚鵡殷勤語，梅檀委曲煙。
鮫綃乾玉筍，魚鑰限金蓮。
團扇詩桃葉，烏絲代杏牋。
朱門長窅窅，白馬自翩翩。
難釣三珠

樹徒拋九寶鞭酒闌應有待夢破即無緣信鵲新秋去
孤蟾後夜圓浪言牆外地的是洞中仙

郎官湖

按李白詩序云乾元歲流夜郎遇故人尚書郎張謂
使夏口沔州杜太守漢陽王令觴于江城之南湖張
公四望超然請白標之嘉名白因號之郎官湖席上
文士輔翼岑靖以為知言今所謂郎官湖者占郡城
之北束手于兩山間縱廣百許步固不足四望而超

然也已知其非是且郡南瀕江之人持南唐時地券
尚指郎官湖為鄰蓋湖為江水所并而去城里餘猶
有洲渚隱然未泯乃湖之故防也余丙子五月舟次
沔陽求訪遺老始得其詳因賦此詩志之

當年賢守令載酒沔南遊涼月呈新霽明湖涵素秋
郎官夏口使仙客夜郎囚促膝青螭舫連觴紫綺裘
高驪隨雨散餘躅想風流芳草失青履滄波浮白鷗
江吞百頃盡石刻一篇留宜有沈碑者前懷陵谷憂

過曹氏園馬上作

香風細細出重牆
不見繁枝已斷腸
知有何人卷簾箔
卧看零落滿斜陽

斗峴山

西來投策倦躋攀
晚葉寒花一逕閒
盡日閒雲不留雨
斜陽還照隔江山

晁補之

字无咎濟州鉅野人父端友工于詩補之幼慧善
屬文年十七從父侔杭州著七述以謁通判蘇軾

賦極稱之由是知名舉進士及別試皆第一調禮
州司戶參軍召試除祕省正字厯著作佐郎章惇
當國出知齊州生修神宗實錄失實左官徽宗立
召拜吏部員外禮部郎中黨論起為諫官管師仁
所論出知河中府徙湖州密州果州遂主宮觀還
家葺歸來園忘情仕進大觀末出黨籍起知泗州
卒年五十八

荳葉黃

蒹葭蒼荳葉黃南村不見岡北村十頃疆東家車滿箱
西家未上場荳葉黃野離離鼠窟之兔入畦豕母從豚
兒豕啼豚咿咿銜角復銜莖荳葉黃穀又熟翁媪哀鋪

糜粥荳葉黃葉黃不獨荳白黍堪作酒瓠大棗紅皺荳
葉黃穰穰何膻膻腰鐮獨健婦大男往何許官家教弓
刀要汝殺賊去

視田贈八弟無斁 二首

河流之所濡一斛泥數斗我莊當水窮乃比石田瘦尚
無東陵瓜況有南山豆天雨不可期且復鞭牛後

薄遊廢家務待子營糗糧莊奴不入租報我田久荒凌
兢馬到門碑兀牛卧場立苗蒼耳根此策殊未長

謁岱祠即事

澤南三百里極望橫天雲雲端色凝黛諦視初可分崢嶸介丘像頽洞元氣屯頃刻有變化慘淡殊明昏天行帝出震其位生物元不周僨西北川乃東南奔寧知六鼇死竟使三山淪不有是難傾孰維大塊根嘗聞周官說實惟天帝孫神靈所鎮守民物斯茫存幽明昭一理有道惟常尊不覺下馬拜僮奴亦遵循迺知正直理足使冥頑敦莫宿太平驛不眠慮絲棼明朝好天色萬象

開胚渾勢橫恒碣盡支壓齊魯蹲五色冒日觀一握通
帝閤恢拓下摧唯青蒼上氤氲泉石競沮洳煙嵐互紛
綸高舉躡風海深蹠蹈火輪濤波卷堆阜一一溟渤吞
碁枰視井邑七箸藏松椿碧瓦峙雙闕紅牆繚長闥願
瞻巖閼宮內滌邪垢魂賜臣登絕頂一覽神秀原萬壑
射窈窕三壇矗嶙峋莽不覩項領何能窮胫跟稍稍指
鳬繹依依數亭云松列大夫爵羸識將軍墳瑣屑澗花
麗霏微崖藥熏廣大良有以奇險安足論解榻坐中觀

洗心馳大釣初疑無字碑瑩潔誰敢文又怪玉女井高
絕何由翕俯穿鬪仙巖鳥下天壁垠側度五賢堂熊經
背逡巡劒石危數履女蘿柔屢捫揮斥八極遠風來袂
軒軒寥廓自無梯猶疑天可賓陰谷不敢視恐落魑魅
羣安得遂獨往身如黃鵠翻徒觀衆山小愁絕下天門

送君

送君馬上時不道朝鑪煥春風入木心
皮膚發紅綠春風良易莫那得勤行路
且莫望南窓胡蝶飛無數

上馬

上馬笑屬君歸期在十日來時草白芽歸時青鬱鬱來
嗔馬蹄急歸嗔馬蹄緩人心自如此馬蹄終不變

開梅山

開梅山梅山開自熙寧之五年其初連峰上參天巒崖
盤嶽閭羣巒南北之帝鑿混元此山不圯藏雲煙躋攀
鳥道出蒼蔚下視蛇脊相蝨緣窮南山南山石室大如
屋黃閔之記盤瓠行跡今依然高辛氏時北有貔貅壓

境中下令購其首妻以少女金盈斗遍國無人有畜狗
厥初得之病老婦以盤覆瓠化而走堪嗟吳將軍屈死
折折口帝皇下令萬國同事成違信道不容竟以女妻
之狗乃負走逃山中山崖幽絕不復人跡通帝雖悲思
深往求輒遇雨與風更為獨力之衣短後裙六男六女
相婚姻木皮草實五色文武溪赤髀皆子孫自以吾父
有功母帝女凌夷夏商間稍稍病侵侮周宣昔中興方
叔幾振旅春秋絕筆逮戰國一負一勝安可數邇來梅

山特險阻黃茅竹箭靈霧雨南人顛踣斃溪弩據關守
隘類穴鼠一夫當其阨萬衆莫能武欲知梅山開誰施
神禹斧大使身服儒賓客盈幕府檄傳徭初疑叩馬卒
歡舞坦然無障塞土石填溪渚但恐關梁通失制後誰
禦開梅山開山易防獠難不如昔人閉玉關

胡戢秀才效歐陽公集古作琬琰堂

君不見廬陵公往為學士修書日詔畀千金訪遺逸遺
文逸字往往出故都易姓幾兵火量齧鼎腹細詰詘道

人岫嶮空有聞丘陵仙鬼事恍惚共和十鼓記亡一嶧
山肉在無復骨雲陽八體又瓜剖至使漢童訛尉律世
儒詭正何足臧公家安取千軸藏題籤甲乙潁水陽後
來胡君癖膏肓傾家自構琬琰堂摻羅近出補厥亡荒
林圯冢見未嘗南觀禹穴計渺茫閉門睥睨在一牀常
恨平生好古家無力騎馬蹊田觀斷刻中郎二字煩走
驛率更三日勞野食長年囊楮况易擲兒作摹朱婦遮
壁願從胡君弓無有十百數中聊取仿胡君今逸民時

貽不見十五春坐令鉛槧老壯士朝廷豈無憂國人曩
時豪氣今雖在會面只謀十日醉聽君汗漫馳古先世
事無何付蟬蛻

贈戴嗣良歌時罷洪府監兵過廣陵為東坡公出
所獲西夏刀劒公命作詩

三郎少日如乳虎代父搏賊驚山東硬弓長箭取官職
自說九戰皆先鋒將軍拳勇饋不繼痛惜靈武奇計空
城頭擲榆下俛走壯士志屈羞填冑平生山西踏霜雪

洪府下溼號兒童聞名未識二十載初見長揖東坡公
銳頭短後凜八尺氣似飲井垂檐虹只令不語當陣立
望見已是千夫雄往年身奪五刀劒名玉所擐犀札同
晨朝攜來一府看竊指私語驚庭中紅妝擁坐花照酒
青萍拔鞘堂生風螺旋鏑鋸波起脊白蛟雙挾三蒼龍
試人一縷立褫魄戲客三招森動容東坡喜為出好礪
洮鴨綠石如堅銅收藏入匣人意定蛾眉稍進琉璃鍾
太平君子尚小忌戒懼邾小母并蜂舞千兩階庶可觀

跳空七劍今何庸從公取礪歸作硯聞公嘗諫求邊功

李成李得閻子常古琴作

昔人流水高山手此意寧從絃上有閻侯卷舌卧閭里
意向是中留不朽似聞綠綺置牀頭暑雨東城無麥秋
趙傳和氏齋五日吳得湛盧當兩州李侯得意誇題柱
成詩欲使邀諸路自有桓山石室彈深屋時聞繭抽緒
無琴尚可何獨絃要識精微非度數人生有累無非失
我欲心灰木為質嬾從微的自凝塵老向詩書逾愛日

自言結習久難除，猶理斷編尋止息。
焦城卜築近連軫，歸約閭侯亦蕭瑟。
舊聞君祖課木奴，試買瑕丘百株粟。

吳松道中 二首

停舟傍河許，四顧盡荒原。
日落孤鳴冢，天寒犬吠村。
繫帆凌震澤，搶雨入盤門。
悵望夫差事，吳山閟楚魂。

曉路雨蕭蕭，江鄉葉正飄。
天寒雁聲急，歲晚客程遙。
烏避征帆却，魚驚蕩槳跳。
孤舟宿何許，霜月繫楓橋。

濟州道中寄葉勛秀才

曉路入西郊新霜著鬢毛貧交借羸馬慈母授征袍野
靜狐狸出天寒雁鵠高艱難憶親舊清淚漬平臯

同魯直和普安院壁上蘇公詩

畏暑聊尋寺追涼故遶池雨園鳩喚婦風徑燕將兒散
篆縈簾額留雲暗井眉龍蛇動屋壁知有長公詩

千秋嶺上

永日倦高躋盤回四望迷松根危抱石嶺路曲隨溪馬
腹飛雲薄山腰過雨低陰崖不可度誰此構長梯

魚溝懷家

生涯身事任東西藥笥書囊偶自貴
柳嫩桑柔鴉欲乳
雪消水動麥初齊沙頭晚日檣竿直
淮上春風鴈鷺低
歸去未應芳物老桃花如錦遍松溪

送曹子方福建轉運判官

談經草檄鬢華生初擁閩山傳節行
江入桐廬青欲斷
溪從劔浦碧來迎茶雖戶種租宜薄
鹽不家煎價欲平
要使祈招歌德意君恩不為遠人輕

泗州王諫議明叟留飲

雲水東遊蚤歲懷
半生塵土却教回
兩行堤柳關心在
一點淮山入眼來
北省主人誇酒好
南風稚子喜帆開
揚州底事牽行色
端為瓊花芍藥催

澠池道中寄福昌令張景良通直

十年一夢間湖湘
欲往從之道阻長
可但知君愛彭澤
不應言我薄淮陽
馬穿嶠底流泉白
鳥下關頭落照黃
愁作驛亭寒不寐
懷人思古九迴腸

次韻邠倅王征夫

函谷雞鳴滿面塵夫君泛愛尚為親
清時有味俱吾黨黃髮相看更幾人
物理未驚翁喪馬世情應笑子知津
似聞絕塞風沙苦只約觥船莫負春

蠓軒孤坐寄曹南教授八弟

畏暑經旬不涉街蠓軒孤坐壁生苔
出簷碧筍猶爭長映戶丹榴故後開
雙蝶風前愁夜去一蟬雨外送秋來
曹南瘦弟應相憶白髮遷兄未放回

遊華嶽歸道中望仙掌

深巖踏遍尋歸路仙掌依然在碧虛無限遊人重駐馬
豈惟狂客倒騎驢挂圖天漢朝霞上落影秦關夕照餘
千古全生纔一士可憐登覽盡丘墟

國子監莫歸

杖屨清晨往縑囊薄莫歸閤官廳事冷蝴蝶上堦飛
譙國嘲提壺

何處提壺鳥荒園自叫春夕陽深樹裏持此勸何人

揚州雜詠

阜莢村南三里許
春江不隔一程遙
雙堤闢起如牛角
知是隋家萬里橋

龍興寺裏青雲幹
后土祠中白雪葩
五百年間城郭改
空留鴨腳伴瓊花

題廬山

南康南麓江州北
五百僧房綴蜜脾
盡是廬山佳絕處
不知何處合題詩

遇赦北歸

山猶故險水猶奔無復前年濺淚痕自是人心隨境別
櫓聲帆色盡君恩

皖口寄懷前太平守陳公度

常愛東陵早拂衣我行曾不叩荆扉憑君天柱峰頭望
看我扁舟幾日歸

沈括

字存中錢塘人博學善文以父任調沭陽主簿擢
進士第為館閣校勘刪定三司條例首訂南郊禮

省費萬計神宗稱善遷中允進太常丞同修起居
注上問以籍民車及禁蜀鹽私井兩事奏對明暢
擢知制誥往聘朔方考究疆界本末塞其爭地之
請歸拜翰林學士以蔡確論出知宣州召知審官
院又出知延州至鎮整理邊政佐西討有功加龍
圖閣學士坐徐禧軍敗謫均州團練副使元祐初
以光祿少卿分司居潤卒年六十五按宋史叙
括為沈遼沈邁諸父行而鄧氏函史則稱從兄弟
或別有
考歟

江南曲

新秋拂水無行跡
夜夜隨潮過江北
西風卷雨上半天
渡口微涼含曉碧
城頭鼓響日脚垂
天際籠煙鎖山色

高樓索莫臨長陌黃竹一聲無北客清平田苦少人耕
惟有蘆花滿江白

潤州甘露寺

前照坊選作張
先詩今改正

丞相高齋半草萊舊時風月滿亭臺地從日月生時見
眼到江山盡處回三國是非春夢斷六朝城闕野花開
心隨潮水漫漫去流向煙村半日來

秀州官舍秋日

草滿池塘霜送梅林疎野色近樓臺天圍故越侵雲近

湖上孤城帶月回客夢冷隨風葉斷秋心低逐雁聲來
流年又喜經重九可意黃花是處開

仙都

苔封輦路上青山鶴馭遼天去不還惟有銀河秋夜月
鼎湖烟浪到人間

姑孰

新晴渡口百花香石子池頭鴨弄黃捲幔夕陽留不住
好風將雨過梅塘

歸計

住山人少說山多空只年年憶薜蘿不是自心應不信
眼前歸計又蹉跎

歎老

為覓少年心不得當時感舊已潜然情懷此日君休問
又老當時二十年

沈遼

字獻達遼弟也幼挺拔不羣長而好學傲睨一世
為文初宗左班二史鋤植縱舍自成一家澹于進

取用兄任監壽州酒稅吳充使三司薦監內藏庫
熙寧初為審官院主簿受知王安石及其當國更
張法令遼持論不阿日益見疎坐與其曹長不合
罷去久之監杭州軍資庫攝華亭縣適他使者至
修夙怨中以法奪官流永州更赦徙池州遂築室
齊山之上名曰雲巢以老焉間作為文章雄奇峭
麗尤長于歌詩元
豐末卒年五十四

鈎母潭

余讀子厚書始聞鈎母潭榜舟西江下振步愚溪南高
下凌山阿松篁蔽秋嵐上人識其地古木森樛楠水深
日波瀾此理亦易探古木為鈎母土音正相參所記或

不然信書殊未甘此公廢已久山水窮年耽造化毫楮
間浮實微相鍊幽心有默識西歸助清談

贈別子瞻

平生雅遊眉陽客五年不見鬚已白借田東坡在江北
芟夷蓬蒿自種麥相逢不盡一樽酒故態那復論歡戚
手抱阿武勸餘漚維摩老夫失定力老夫寂寂出三湘
更欲卜居池水陽薄田止須數十畝田上更樹麻與桑
老來正苦迫生事清明雖近猶未秧罷亞若可博乾麩

以無易有遙相望我舟即行不得駐欲卜後會誠茫茫
他時有信如相寄不用辛苦為詩章

龜茲舞

龜茲舞龜茲舞始自漢時入樂府世上誰傳此樂名不
知此樂猶傳否黃扉朱邱畫無事美人親尋教坊譜衣
冠盡得畫圖看樂器多因西域取紅綠結袂坐後部長
笛短簫形製古雞婁揩鼓舊所識饒貝流蘇分白羽玉
顏二女高髻花孔雀羅衫金畫縷紅靴玉帶踏筵出初

驚翔鸞下玄圃中有一人奏羯鼓頭如山兮手如雨其
間曲調雜晉楚歌詞至今傳晉語須臾曲罷立前廡歎
息平生未嘗睹清都閬苑昔有夢寂寞如今在何所我
家家住江海涯上國樂事殊未知玉顏邀我索題詩他
時有夢與誰期



宋元詩會卷二十七